

欽定大清會典事例

欽定大清會典事例卷四百六

禮部

風教

收養孤幼  
鄉飲酒禮

一產三男

收埋枯骨

收養孤幼。康熙元年。於

京師廣渠門內。建立育嬰堂。遇有遺棄病廢之嬰

兒。收養於堂。有姓名年月日時可稽者。一一詳

註於冊。雇覓乳婦。善為乳哺撫養。有願收為子

孫者。問明居址姓名方與之。仍補註於冊籍。至

本家有訪求到堂識認者。亦必詳細問明。與原

註冊籍無訛。方許歸宗。雍正二年

諭聞廣渠門內有育嬰堂一區。凡孩稚之不能養育者。收留於此。數十年來。成立者頗衆。夫養少存孤。載於月令。與扶衰恤老。同一善舉。為世俗之所難。朕心嘉悅。特賜御書功深保赤扁額。並白金千兩。順天府尹等。其宣示朕意。並倡率資助。使之益加鼓勵。再行文各該督撫轉飭有司。勸募好善之人。於通都大邑人煙稠集之處。若可以照京師例推而行之。其於字弱恤孤之道。似有裨益。而凡人怵惕惻隱之心。亦可感發而興起矣。乾隆六年。覆准通行直省督撫。將現在設有育嬰堂。嚴飭地方官實力奉行。擇富厚

誠謹之人董理。並令州縣率同佐貳。不時稽查。將實在無依遺棄嬰兒。收入養贍。每於年終。將所育嬰兒。及支存細數。分析造報查覈。如有怠玩。剋扣需索等弊。即行報參。○道光九年奏准。安徽省太平府育嬰堂。年久頽廢。現由紳士捐輸修復。俾成善舉。○十年奏准。江蘇省無錫金匱兩縣紳士。創建同仁堂兼育嬰所。凡孤幼無依嬰兒。善為收養。○同治二年

諭。庶子夏同善奏請籌撫恤難民一摺。東南新復地方。所有婦女及老弱廢疾窮民。湯火餘生。顛連困苦。據

該庶子所奏情形。殊堪矜憫。著曾國藩左宗棠李鴻章加意撫恤。飭令所屬各地方官。多設收養處所。藉其姓氏里居榜示。俾其親屬得以認領。至收養之資。酌撥正款。是否可行。或先行借撥正款籌辦。一面倡率勸捐。或即行倡捐辦理之處。均由該督撫等酌量妥籌。總期於難民中之婦女及老弱廢疾者。得邀撫恤。不至甫離水火。仍復流亡。用副朝廷軫念災黎至意。

一產三男。康熙二年定。凡一產三男。或男女並產。八旗由禮部具題。直省由該督撫具題。由

部題覆行戶部。准給米五石。布十疋。○十三年定。一產三男。仍准題覆。其男女並產及一產三女者。不必具題。○三十三年

諭。一產三男。令禮部定議。即交戶部具奏。照例賞給。○

三十五年

諭。嗣後如有一產三男等事。該督撫具題。著該部照例行文賞給。停止單題。歲終彙題以聞。○乾隆二十九年議定。將一產三男專題一本停止。嗣後改為咨報本部。並一面咨報戶部。照例行文賞給外。本部仍於歲終彙題。以歸簡易。○嘉慶十二年。

禮部題覆察哈爾站兵吹扎布之妻一產三男  
一疏奉

旨。察哈爾站兵吹扎布之妻一產三男。禮部題請照直  
省民人之例。賞給米五石。布十疋。蒙古以牲畜為養  
生之資。賚以米布。在本家俱不適用。著交該都統等  
覈照米五石布十疋所值。折給馬牛羊等項牲畜。俾  
資生計。嗣後蒙古地方有一產三男者。照此賞賚。

收埋枯骨。○順治九年題准。直省饑饉死者。暴  
骨草野。各令委官掩埋。仍將埋過數目報部。又  
令各地方官於空閒官地。設立義冢。凡死不能

葬及無主暴骨。盡行收埋。如有好義之人。收瘞貧屍。及掩埋枯骨數多者。有司勘實。給扁旌獎。  
○十年欽奉

恩詔。八旗貧無葬地者。每旗各撥給塋地三百畝。康熙十七年議准。三旗內府佐領。每一佐領給塋地三十六畝。滿洲蒙古每佐領給塋地十有八畝。漢軍每佐領給塋地十畝。○二十四年議准。直省地方。如有無主暴露枯骨。各該地方官建置義冢。立法收埋。仍咨報部。○道光元年

諭。朕聞京城內外時疫傳染。貧民不能自備藥劑。多有



倉猝病斃者。其或無力買棺斂埋。情殊可憫。著步軍統領衙門。順天府五城。慎選良方。修和藥餌。分局施散。廣為救治。再掩骼埋胔。王政所存。並著設局散給棺槨。毋使暴露。俟疫氣全消之後。分別報銷。用示朕救災恤民至意。

鄉飲酒禮○凡

京師鄉飲酒禮。順天府尹為主人。前一日。執事者於府學講堂。陳設坐次。監禮席於庭東北嚮。賓席於堂西北南嚮。主人席於堂東南西嚮。介席於堂西南東嚮。眾賓之長三人。席於賓西南嚮。

東上。皆專席不屬。衆賓席於西序東嚮。僚佐席於東序西嚮。皆北上。司正席於主人之東北嚮。設律令案於主介間正中。又設尊案一於東序端。司正豫率執事習禮。樂部和聲署。設樂於西階下。至日黎明。執事者宰牲具饌。監禮主人及僚屬司正先詣學。遣人速賓介以下。比至。主人率僚屬出迎於庠門之外。揖。賓介衆賓皆答揖。賓入。介衆賓從入。主居東。賓居西。贊禮者立階前。贊揖。主及賓三揖三讓而後升堂。東西相嚮立。贊兩拜。交拜畢。賓即席。乃延介。一讓升。介升。

拜如賓禮。介即席。乃延衆賓。以次皆升。主人揖。皆答揖。即席。主人率僚佐皆即席。咸坐。贊司正揚解。執事者引司正由西階升。詣堂中北嚮立。贊起立。賓介以下皆立。贊揖。司正賓介以下皆揖。執事者以解酌酒授司正。司正舉酒曰。恭惟朝廷。率由舊章。敦崇禮教。舉行鄉飲。非為飲食。凡我長幼。各相勸勉。為臣盡忠。為子盡孝。長幼有序。兄友弟恭。內睦宗族。外和鄉黨。無或廢墜。以忝所生。讀畢。贊司正飲酒。飲畢。以解授執事。贊揖。司正揖。賓介以下皆揖。司正復位。賓介以下

皆坐。贊讀律令。執事者舉律令案於堂之中。引禮引讀律令者詣案前。北面立。賓介以下皆立。行揖禮如前。讀畢復位。贊供饌。執事者舉饌案至賓前。次介。次主。三賓以下各以次設。贊獻。賓主起。北面立。執事斟酒以授主。主受爵詣賓前。置於席。少退。贊兩拜。賓答拜訖。主退復位。贊賓酌酒。賓起。介從執事者斟酒授賓。賓受爵詣主前。置於席。少退。贊兩拜。賓主交拜訖。賓退復位。主人起獻介。介酢主人如前儀。乃各就位坐。執事者詣三賓衆賓以下。以次斟酒於席訖。贊飲。

酒。酒三行。贊奏樂。工升歌。周詩鹿鳴之章。卒歌。  
笙奏。

御製補南陔詩。閒歌。周詩魚麗之章。笙奏。

御製補由庚詩。乃合樂。歌。周詩關雎之章。卒歌。工告備。  
出。執事者行酒。主賓以下飲。無算爵。贊徹饌。徹  
饌訖。賓介主以下皆興。主僚屬居東。賓介三賓  
衆賓居西。贊兩拜。賓主介拜訖。贊送賓。賓介衆  
賓主人以次下堂。分東西行。出庠門。一揖退。監  
禮者出。主人送禮畢。乃皆退。直省鄉飲酒禮。府  
以知府州以知州。縣以知縣為主席。餘儀同。如

鄉大夫來觀禮者。坐於東北。順天府及直省會  
城。一品席南嚮。二品席西嚮。各府州縣三品  
以上席南嚮。四五品席西嚮。○順治元年定。京  
無則闕之。不入舉報之數。  
府及直省府州縣。每歲於正月十五日。十月初  
一日。舉行鄉飲酒禮。設賓介主人衆賓之席。順  
天以府尹為主。直省府以知府。州以知州。縣以  
知縣為主。大賓擇鄉里年高有德之人。位於西  
北。介以次長。位於西南。三賓以賓之次者為之。  
位於賓席之西。衆賓序齒列坐。司正以教職為  
之。主揚解以罰失儀者。贊禮讀法。以生員為之。  
以申明

朝廷之法。敦序長幼之節。○二年定順天府詳稽鄉飲酒禮舊制。移送禮部題請施行。嗣後每歲由順天府具題。將所舉賓介等姓名履歷呈部存案。○又定鄉飲酒讀律令曰。律令。凡鄉飲酒序長幼。論賢良。高年有德者居上。其次序齒列坐。有過犯者不得干與。違者罪以違制。失儀。則揚解者以禮責之。○康熙元年議准。奉天府州縣行鄉飲酒禮儀與順天同。○四年議准。錦州府州縣行鄉飲酒禮儀與奉天同。○雍正元年諭。鄉飲酒禮乃敬老尊賢之古制。近聞年久視為具文。

所備筵燕亦甚草率。應加謹舉行。○又順天府舉行鄉飲酒禮。

特命禮部堂官前往監禮。歲以為常。○乾隆二年議准。嗣後鄉飲酒禮。坐次悉依定序。並先刊刻儀節。分給賓僕執事人等。遵照行禮。應讀律令。即開載於儀節之後。令讀者照例講讀。其在省會。令督撫派委大員監禮。各府州縣亦令該地方官實心奉行。有違條越禮者。依律懲治。又鄉飲之典。重在賓僕得人。方可以示觀感而興教化。若該地方官徇情濫舉。固屬不職。乃亦有實係齒



德兼優之人。而一種不肖之徒。於未舉之先。設計需索。及行舉之後。又復索癩求疵。聲言冒濫。希圖訛詐。以致地方官亦多瞻顧。每不舉行。致曠大典。其於敦勸孝弟。整齊風俗之處。大有關係。嗣後令該督撫通行嚴飭。所舉賓僎。務擇齒德兼優。允協鄉評之人。如地方官濫舉。題參議處。儻所舉得人。而不法之徒。或有藉端阻撓者。嚴行究治。○十八年議覆廣東巡撫將香山縣堪舉鄉飲之人。造冊送部查覈。若各該省逐處造報。為數繁多。未免案牘紛煩。嗣後將通省彙

齊造具總冊送部。以憑查覈。通行各省督撫。畫  
一辦理。○又覆准。各省舉行鄉飲。事不畫一。且  
竟有頻年闕略不舉。致曠廢大典者。令各省督  
撫轉飭所屬府州縣。每歲遵照定例。於正月十  
月舉行二次。其賓介之數。據舊儀所載鄉飲酒  
圖。有大賓介賓一賓二賓三賓衆賓。與大僕一  
僕二僕三僕之名。按儀禮賓若有尊者。諸公大  
夫。則既一人舉解。乃入。注言。今文遵為僕。又曰。  
此鄉之人。仕至大夫者。來助主人樂賓。主人所  
祭而遵法者也。或有無來不來。用時事耳。又曰。

不干主人正禮也。謂之賓者。同從外來耳。大國有孤。四命謂之公。又疏言。一人舉解為旅酬。始乃入。即時作樂前入。又戴記坐僕於東北。以輔主人。所謂席於賓東。助主人樂賓者也。其言主人親速賓及介。而衆賓自從之。至於門外。主人拜賓及介。而衆賓自入。三揖至於階。三讓以賓升。拜至獻酬。辭讓之義繁。及介省矣。至於衆賓。升受坐祭卒飲不酢而降。皆無一言及僕者。所謂不干主人正禮者也。嗣後令順天府及直隸府州縣。先期訪紳士之年高德劭者。一人為賓。

次為介。又次為衆賓。皆由州縣詳報府尹督撫。覈定舉行。其本地有仕至顯官。偶居鄉里。願來觀禮者。依古禮坐於東北。順天府及直省會城。一品席南嚮。二三品席西嚮。各府州縣。三品以上席南嚮。四五品席西嚮。無則闕之。不立一僎。二僎三僎之名。不入舉報之內。仍將所舉賓介。造具姓名籍貫清冊。送部存案。儻鄉飲後。間有過犯。按所犯輕重。詳報褫革。咨部除名。並將原舉之官議處。○二十五年議准。嗣後順天府鄉飲屆期。責成該府尹。督率各州縣。實力遵訪。務

得年齒品行允孚衆望之人。仍照學政全書定制舉行。如實在不得其人。任闕無濫。即行停止。報部存案。其直省舉報鄉飲。責成布政使覈實報明督撫查覈存案。不得其人。即詳明停止。不得拘於成例。苟且塞責。○又議覆。嗣後舉報鄉飲酒禮。停止專本具題。○二十七年議准。嗣後凡鄉飲賓內。除貢監生已經考職候選者。仍照應選之職服用頂帽補褂外。其餘監生用金雀頂。青袍藍邊。生員銀雀頂。藍袍青邊。至於耆民本無品級。即穿用鮮明常服。不得濫用金頂補。

服。○道光二十三年奏准。各直省額設鄉飲酒  
禮銀兩一款。嗣後全數解司報撥充餉。如各屬  
有願循故事以崇禮讓者。即由該地方官捐廉  
備辦。仍照例於年終將各屬舉充鄉飲各員姓  
名年歲籍貫彙冊咨部。

欽定大清會典事例卷四百七

禮部

儀衛

儀衛通例

王公儀衛

公主以下儀

儀衛通例。凡儀衛親王。紅羅繡五龍曲柄繖

一。紅羅繡四季花繖二。紅羅銷金瑞草繖二。紅

羅繡四季花扇二。青羅繡孔雀扇二。立瓜臥瓜

骨朵吾仗各四。大轟二。條轟二。旗槍十。

各依本旗色。

豹尾槍四。儀刀四。馬六匹。世子。紅羅繡四龍曲

柄繖一。紅羅銷金瑞草繖二。紅羅繖一。紅羅繡

四季花扇二。青羅繡孔雀扇二。立瓜吾仗各四。

臥瓜骨朵各二。大纛一。條纛一。旗槍八。豹尾槍  
二。儀刀二。馬六匹。郡王。紅羅繡四龍曲柄纛一。  
紅羅銷金瑞草纛二。紅羅繡四季花扇二。青羅  
繡孔雀扇二。立瓜吾仗各四。臥瓜骨朵各二。條  
纛二。旗槍八。豹尾槍二。儀刀二。馬六匹。以上執  
事人。轎夫用繡團獅綠緞衣。親王以下。入八分  
公以上。轎夫執事人均黑氈帽。緞絨纓。上安銅  
管。插紅翎。繫紅布帶。貝勒。紅羅銷金瑞草纛一。  
紅羅繡四季花扇二。立瓜臥瓜骨朵吾仗各二。  
條纛一。旗槍六。馬四匹。長子同貝子。紅羅銷金



瑞草織一。紅羅繡四季花扇二。立瓜骨朵吾仗各二。條燾一。旗槍六。鎮國公。紅羅銷金瑞草織一。青羅繡孔雀扇一。骨朵吾仗各二。旗槍六。輔國公與鎮國公同。以上執事人。轎夫用素綠緞衣。鎮國將軍。杏黃織一。旗槍六。輔國將軍同。奉國將軍。旗槍四。鎮國將軍以下至宗室。轎夫執事人均黑氈帽。上安裏錫木頂。插綠翎。用青布衣。繫綠鑲紅布帶。遇元日。

萬壽聖節冬至朝賀之期。各儀衛全設。常日在

京師。親王用曲柄織一。紅羅織扇各二。立瓜臥瓜

骨朵吾仗全。馬四匹。引導十人。世子減曲柄繖。及引導二人。餘視親王。郡王馬二匹。餘視世子。貝勒繖一。立瓜臥瓜骨朵吾仗全。引導六人。貝子用立瓜骨朵吾仗。引導四人。鎮國公用骨朵吾仗。引導二人。輔國公同。鎮國將軍用前引二人。後從六人。輔國將軍前引一人。後從四人。奉國將軍後從同。若因事出京。王以下均全設。如儀。固倫公主。紅羅曲柄繖。寶相花繖一。紅羅繡寶相花扇二。青羅繡寶相花扇二。紅羅繡孔雀扇二。黑纛二。立瓜臥瓜骨朵吾仗各二。引導十

人和碩公主。減寶相花扇及引導二人。餘視固倫公主。郡主。減曲柄繖臥瓜。引導二人。餘視和碩公主。以下執事人衣帽與親王同。縣主。寶相花繖一。寶相花扇二。立瓜。吾仗各二。引導二人。以上執事人衣帽與貝勒同。親王。福晉視固倫公主。世子。福晉視和碩公主。郡王。福晉視郡主。貝勒夫人視縣主。遇朝賀日。固倫公主許隨入侍女五人。親王。福晉和碩公主。世子。福晉四人。郡主。郡王。福晉。縣主三人。郡君。貝勒夫人二人。縣君。貝子夫人。鄉君。公夫人各一人。固倫公主。

額駙。紅繖二。豹尾槍二。旗十。紅仗二。執事人有  
帽銀頂插紅翎青衣紅帶。和碩公主額駙。杏黃  
繖二。旗十。紅棍四。大小扇二。各飾方金四。執事  
人紅帽銅頂插綠翎青衣紅帶。郡王額駙。杏黃  
繖一。旗十。紅棍四。扇二。各飾方金三。縣主額駙。  
杏黃繖一。旗六。郡君額駙旗如之。縣君額駙旗  
四。鄉君額駙旗二。公視和碩公主額駙。侯金黃  
棍四。餘視郡主額駙。其有加級者。棍得用紅。伯  
扇二。各飾圓金一。餘視侯子繖一。旗八。棍二。扇  
二。各飾圓金四。男旗六。扇二。各飾圓金三。餘視

子。京官一品視子。二品視男。三品扇二。各飾圓金二。餘視二品。四品旗四。扇二。各灑以金。餘官均用素扇。宗室覺羅之有職者。各從其品。其扇柄及棍。均髹以朱。各儀衛出京外得全設。在京師不得用。旗纒黃棍。公以下三品官以上得用。前引二人。後從。一品官八人。二品六人。三品四人。四品二人。五品以下一人。文官三品以上得用甘蔗棍二。武職三品以上得用椶竹棍二。自一品至九品。均得用扇。扇各用清漢字書銜。若

進

皇城内。大扇棍及前引人均不得入。直省官。文官  
總督旗八。飛虎旗黃繖扇。兵拳雁翎刀。獸劍黃  
棍。桐棍。槩各二。槍四。迴避牌二。肅靜牌二。巡撫  
槍二。減飛虎旗。兵拳雁翎刀。餘視總督。布政使  
按察使旗六。減獸劍。桐棍。槍。餘視巡撫。道。知府  
旗四。黃繖扇各一。桐棍。槩。迴避。肅靜牌各二。府  
倅。知州。知縣。藍繖一。減迴避牌。餘視知府。縣佐  
藍繖一。桐棍二。學官。藍繖一。雜職。竹版二。總督  
河道。漕運。視總督。學政。織造。三品以上。視巡  
撫。四品以下。視兩司。武官。提督。刑杖二。減桐

棍。槩棍。餘視總督。總兵官槍二。大刀二。減兵拳  
雁翎刀。刑杖。餘視提督。副將旗六。黃纛一。扇二。  
黃棍迴避。肅靜牌各二。參將遊擊都司旗四。扇  
一。桐棍二。餘視副將。守備減牌。餘視都司。駐防  
將軍視內都統。副都統以下官。均與京官同。  
凡輿馬。王公乘明轎。親王世子郡王貝勒輿夫  
八人。貝子公四人。暖轎。親王金黃蓋金黃幢紅  
幢。世子紅蓋金黃幢紅幢。郡王紅蓋紅幢紅幢。  
貝勒紅蓋青幢紅幢。貝子紅蓋紅幢青幢。鎮國  
公阜蓋紅幢阜幢。輔國公青蓋紅幢青幢。均用

銀頂馬韉。親王世子郡王用金黃。貝勒貝子用  
紫。公用青。公主親王世子郡王福晉用金黃。長  
子貝勒貝子夫人用紫。公主以下縣主以上乘  
轎及車。郡王以下乘車。幃蓋幃均用纁。固倫公  
主金黃蓋。四角緣紅。和碩公主紅蓋。四角緣金  
黃。均紅幃。金黃幃。郡主紅幃。蓋角緣皂。縣主青  
幃。蓋角緣青。均紅蓋。紅幃。郡君青幃。紅蓋。四角  
緣青。縣君皂幃。皂蓋。四角緣紅。均紅幃。鎮國公  
女鄉君皂蓋。四角緣青。皂幃。紅幃。輔國公女青  
幃。蓋去緣飾。餘視鎮國公女。王福晉以下。貝勒



夫人以上。乘轎及車。貝子夫人以下。乘車。郡王長子福晉以上。得用朱轆。奉國將軍淑人以上。均得用朱輪。幃蓋幃均用繒。鎮國將軍夫人以下。繒用素。親王福晉金黃幃。世子福晉紅幃。郡王福晉皂幃。均紅蓋紅幃。蓋角緣皂。貝子夫人蓋角緣青。青幃。均紅蓋紅幃。鎮國公夫人蓋角緣紅。輔國公夫人蓋角緣青。均皂蓋皂幃。紅幃。王以下公以上各側室。均降適一等。鎮國將軍一品夫人皂蓋。輔國將軍夫人青蓋。均青幃。紅幃。奉國將軍淑人幃。

蓋幟均用皂。奉恩將軍恭人如之。閒散宗室青幟。餘亦如之。京官滿洲文武均乘馬。一品文官年老疾病不能乘馬者許乘轎。漢人文官乘轎。三品以上頂用銀幟。蓋用皂。在京昇夫四。出京昇夫八。四品以下頂用錫。昇夫二。出京四。直省文官乘轎。督撫昇夫八。司道以下教職以上昇夫四。雜職乘馬。餘同京官。總督河道漕運視總督。學政織造暨各

欽差官。三品以上視巡撫。四品以下視兩司。武官將軍副都統提督總兵官視巡撫。副將視兩司。協

領參遊以下均乘馬。文三品武二品官以上用引馬。文武四品官以上馬繫繫纓。各品官命婦乘車。輪轆均用黑色。民公夫人蓋角緣阜。侯伯夫人蓋角緣青。均綠蓋阜。幃綠幃。子一品夫人阜蓋四角緣綠。餘視伯。男夫人去緣飾。餘視子。品官命婦。一品視子。二品視男。三品阜幃。餘視二品。四品青幃。餘視三品。五品以下均青蓋。餘視四品。三品以上命婦頂用銀。餘均用錫。幃蓋幃。二品以上命婦用繒。餘均用布。

王公儀衛。崇德元年定。親王銷金紅繖二。素

二。旗十。立瓜骨朵各二。吾仗四。郡王銷金紅繖  
一。轟一。旗八。臥瓜二。吾仗四。貝勒旗六。骨朵紅  
仗各二。繖轟視郡王。貝子畫雲紅繖一。豹尾槍  
二。旗六。紅仗二。城內止用繖仗。鎮國公紅繖一。  
餘視貝子。城內止用紅仗。以上各執事人均青  
衣紅帶。青帽銀頂上插紅翎。輔國公豹尾槍一。  
餘視鎮國公。城內止用紅仗。執事人青衣紅帶。  
藍翎紅氈帽。鎮國將軍金黃繖一。旗六。城內用  
前引二名。後從六名。輔國將軍旗繖視鎮國將  
軍。城內用前引一名。後從四名。奉國將軍旗四。

城內用後從四名。○又定王公等至

御前。均不得設儀衛。○順治九年題准親王紅羅繡

五龍曲柄繖一。紅羅銷金繖二。紅羅繡花繖二。

紅羅繡花扇二。青羅繡孔雀扇二。立瓜臥瓜骨

朵吾仗各四。大轟二。條轟二。旗十。大刀二。豹尾

槍二。馬六匹。京城內止用曲柄繖一。繡花繖扇

各二。立瓜臥瓜骨朵吾仗全。馬四匹。世子紅羅

繖一。臥瓜骨朵吾仗各二。大轟條轟各一。旗八。

大刀二。減紅羅繡花繖豹尾槍。餘視親王。京城

內止用銷金繖二。繡花扇二。立瓜臥瓜骨朵吾

仗全。馬四匹。郡王吾仗四。條轟二。減紅羅繖大  
轟大刀。餘視世子。京城內用馬二匹。立瓜臥瓜  
骨朵吾仗全。繖扇視世子。貝勒紅羅繖金繖二。  
紅羅繖花扇二。立瓜臥瓜骨朵吾仗各二。條轟  
一。旗六。馬四匹。京城內止用銷金繖一。立瓜臥  
瓜骨朵吾仗全。貝子紅羅銷金繖一。減臥瓜及  
馬。餘視貝勒。京城內止用立瓜骨朵吾仗。鎮國  
公紅羅銷金繖一。青羅繖孔雀扇一。骨朵吾仗  
各二。旗六。京城內止用骨朵吾仗。輔國公儀衛  
視鎮國公。鎮國輔國奉國各將軍。仍照崇德元

年例。各儀衛出京城。乃許全設。還元日。

萬壽聖節。冬至大朝日。除轟旗外。餘均全設。至下馬牌止。○又定。親王至。

午門外。郡王至。

闕下。貝勒以下在。

闕門外下馬牌。各下轎馬。○又定。王公均得乘明轎。王以下。貝勒以上。用轎夫八人。貝子公四人。貝勒。貝子。公。乘轎至。

皇城外易馬入。如願乘馬者聽。○康熙六年題准。親王。郡王。轎夫執事人。用繡團獅綠緞衣。貝勒。

貝子公轎夫執事人。素緣緞衣。○二十四年題准。宗室親王世子郡王馬韁用金黃。長子貝勒貝子用紫。不得給予內外官員。其從前給過者。概行禁止。○六十一年奉

旨。向例親王豹尾槍二。大刀二。郡王則無。親王著給豹尾槍四。大刀四。郡王給豹尾槍二。大刀二。○乾隆二年覆准。金黃秋香色鞞轡。惟

特恩賞用金黃朝衣坐褥之王等許用。其餘親王以下。均不得用。○二十一年奏准。世子增豹尾槍二。長子儀衛與貝勒同。○三十四年奉



旨。內廷阿哥所乘馬匹。向來皆用黃扯手。皇孫阿哥等皆用紫扯手。其後或有在內廷長養。遂與阿哥等一體用黃色者。此亦未免稍過。或有以為分府竟用藍色者。此亦未能允協。自應酌定。以皇子皇孫輩數分別等差。嗣後內廷阿哥等所乘馬匹。俱著用黃扯手。其皇孫阿哥等。除朕施恩賞用者。准其用黃扯手外。其未經賞用者。所有用黃色藍色者。概行禁止。俱著一體用紫扯手。即皇曾孫皇元孫等。亦著照此用紫扯手。其鞦座著各按所用扯手顏色乘用。綿德綿恩皆係長孫。著施恩仍賞用黃扯手。永著為令。○五十

一年奉

旨。入八分宗室公等。均係寶石頂。惟扯手向仍用藍色。似無區別。所有入八分宗室公等。著加恩賞用紫扯手。○又

諭。向來親王郡王固倫公主和碩公主門上總管首領太監俱無給予頂戴之例。原以此等太監在親王等門上服役。非承直內廷者可比。是以向來雖有總管首領名色。並無官職。但親王郡王為宗潢屏翰。公主係皇帝親女。其諳達太監總管首領太監內。即酌量給予頂戴一人。尚不為過分。從前親王郡王公主家

太監亦有特恩賞給頂戴者。嗣後親王郡王固倫公主和碩公主太監內各准給八品頂戴一人。將名姓報禮部內務府備查。不得私有增益。○五十七年

諭向來親王郡王以下府第俱有定制。載在會典。惟門首設立行馬下馬椿及高下寬窄遠近之處。並未開載。但行馬下馬椿為規制攸關。會典未有明條。難以遵循。亦應明立限制。以示等威。此後親王固倫公主郡王和碩公主及貝勒門首俱准設立行馬下馬椿。貝子以下不得僭用。其尺寸高下寬窄。距府第遠近若干。應如何分別等差。著宗人府會同步軍統領衙

門詳議章程具奏。至諸王園居。惟彩霞園曾經

皇祖駐蹕。是以門外建蓋東西相嚮朝房二座。自應仍存其舊。此外諸王公主之園居。俱不准建蓋朝房。以示限制。其親王郡王之子孫。以次降封至貝子以下。其舊居府第規制。毋庸更改。惟行馬及下馬椿。應照定制撤去。不得僭用。並交宗人府存記遵照。欽此。遵旨議定。親王門首之下。馬椿應高一丈。郡王門首之下。馬椿高九尺。貝勒門首之下。馬椿高八尺。其行馬。親王安設八塊。郡王安設六塊。貝勒安設四塊。每塊以五尺為率。再自親王至貝勒之園居。

除道

旨不准建蓋朝房外。其門首應設行馬。城內府第應設下馬椿之遠近。惟視其地勢之寬窄。酌量安設。總於街衢行人無所阻礙。今雖定以限制。其安設與否。亦止聽其自便。若欲安設者。不得過此定制。其貝子以下。不得妄設者。不得濫行僭用。

○嘉慶四年奉

旨。向來宗室王公。及一品文武大臣所用太監。並未定有額數。以致投充私宅太監人數過多。宮內服役者。轉不敷應用。不得不向各王公大臣家取進。而各王

公家中有太監少者。現用重價尋覓者亦有。皆朕所深知。自應分別定以成數。用符體制。嗣後親王准用七品首領一名。太監四十名。郡王准用八品首領一名。太監三十名。貝勒准用太監二十名。貝子准用太監十名。入八分公准用太監八名。一品以上文武大臣准用太監四名。公主額駙准用太監十名。民公准用太監六名。其未入八分公及二品以下民爵候以下。俱不准私用太監。經此次定額之後。如有不願多役太監者。聽其自便。亦不必拘於成額。儻有仍前任意濫用。致逾定額者。即以違制論。總之外宅各處太

監之數。寧絀無贏。而宮內所需太監。此後亦不復再向外宅挑取。將此通行傳知。一體遵照。並著現在王公大臣宅內太監名數。有浮於新定之額者。即交到內務府衙門送進宮內當差。嗣後宗室王公等名下太監。著年終報明宗人府查覈。一品文武大臣等名下太監。著年終報明都察院查覈。俱各彙奏一次。著為例。○六年。儀親王。成親王。定親王。門上。奉旨。各增賞八品頂戴太監一名。慶郡王。門上。奉旨。增賞七品頂戴太監一名。○道光二十五年。諭。嗣後親郡王。貝勒。貝子。例應在紫禁城內騎馬者。如

年至六十五歲俱准其乘坐二人椅轎。

公主以下儀衛。○崇德元年定。固倫公主清道旗二。銷金紅繖一。青扇一。拂子二。金水盃一。金盆一。紅仗吾仗各二。轎車均用紅蓋紅幃。青緣蓋角。青垂幃。和碩公主減旗及金盃。餘視固倫公主。轎車紅蓋紅幃。藍緣蓋角。藍垂幃。以上赴朝止用繖扇紅仗吾仗。郡主減金盆及紅仗。餘視和碩公主。轎車青蓋青幃。紅緣蓋角。紅垂幃。赴朝用繖扇吾仗。縣主紅仗二。減扇吾仗。餘視郡主。車青蓋藍幃。紅緣蓋角。紅垂幃。郡君銷金



青繖一。紅仗二。車藍蓋藍幃。紅垂幃。赴朝止用  
繖紅仗。縣君紅仗二。車藍蓋藍幃。紅緣。青垂幃。  
赴朝用紅仗。鄉君車與縣君同。○順治九年題  
准。固倫公主曲柄繖一。紅寶相花繖二。青寶相  
花扇二。紅孔雀扇二。轟二。立瓜臥瓜骨朵。吾仗  
各二。轎車均用紅蓋紅幃。青緣蓋角。紅垂幃。和  
碩公主減寶相花扇。餘視固倫公主。轎車紅蓋  
紅幃。青緣蓋角。青垂幃。郡主減曲柄繖臥瓜。餘  
視和碩公主。轎車紅蓋紅幃。藍緣蓋角。藍垂幃。  
縣主紅寶相花繖一。青花扇二。立瓜吾仗各二。

轎車青蓋青幃。紅緣蓋角。紅垂幃。郡君車青蓋  
藍幃。紅緣蓋角。紅垂幃。縣君車藍蓋藍幃。紅垂  
幃。鎮國公女鄉君車藍蓋藍幃。青緣。紅垂幃。輔  
國公女鄉君車藍蓋藍幃。紅緣。青垂幃。○康熙  
六年題准。公主郡主轎夫執事人。用繡團獅緣  
緞衣。縣主轎夫執事人。素緣緞衣。公主以下鄉  
君以上赴朝。儀衛至。

紫禁城止。固倫公主許隨入婦女五名。和碩公主  
郡主四名。縣主三名。郡君二名。縣君鄉君一名。  
○三十年定。固倫公主轎車。金黃蓋紅幃。紅緣

蓋角。金黃垂幃。和碩公主。紅蓋紅幃。金黃緣蓋角。金黃垂幃。郡主。紅蓋紅幃。青緣蓋角。紅垂幃。縣主。紅蓋紅幃。藍緣蓋角。藍垂幃。郡君。紅蓋藍幃。藍緣蓋角。紅垂幃。縣君。青蓋青幃。紅緣蓋角。紅垂幃。鎮國公女。鄉君。青蓋青幃。藍緣蓋角。紅垂幃。輔國公女。鄉君。青蓋藍幃。紅垂幃。○乾隆二年。覆准。金黃馬韉。金黃轎襍。惟公主。王福晉。得用。郡主。夫人。以下。均不得用。○五十一年。

諭。固倫公主。和碩公主。均為皇女。體敵藩封。一切禮儀。護衛。會典內。並未定有等級。遂至體例不一。互有增

損。嗣後固倫公主品秩著視親王。和碩公主品秩著視郡王。其額駙品級頂戴仍照會典舊例。至公主下嫁時。一切禮儀護衛員數。固倫公主即照和敬固倫公主之例。和碩公主即照和嘉和碩公主之例。著禮部內務府會同定議具奏。載入會典事例。永遠遵行。欽此。遵。

旨議奏。和敬固倫公主下嫁時。照例陪往人丁十二戶內。按例應放頭等護衛二員。二等護衛四員。三等護衛四員。五品典儀一員。六品典儀一員。和嘉和碩公主下嫁時。照例陪往人丁十戶內。亦

經該府放二等護衛四員。三等護衛四員。六品  
典儀一員。七品典儀一員。俱係虛銜頂翎。仍食  
原餉。嗣後固倫公主。即照和敬公主之例。和碩  
公主。即照和嘉公主之例辦理。此項護衛等官。  
先儘陪送人丁內揀補。儻一時不得其人。准其  
於該府家人內揀補。報明內務府註冊。其辦理  
家務長史一缺。向係在於內務府廢員內揀選。  
尚堪任事之人。奏請放為副內管領。作為長史。  
給食六品單俸。固倫公主長史。給予三品虛銜。  
頂戴孔雀翎。和碩公主長史。給予四品虛銜。頂

戴孔雀翎之處。應仍照舊例辦理。奉

旨。固倫公主分內。著定為三品翎頂長史一員。頭等護衛一員。二等護衛二員。三等護衛二員。六品典儀二員。和碩公主分內。著定為四品翎頂長史一員。二等護衛二員。三等護衛一員。六七品典儀各一員。不必拘定陪嫁人戶。聽從公主隨便揀放。餘依議。○又奉

旨。向來固倫和碩公主。俱乘坐銀頂轎。嗣後固倫公主著坐金頂轎。和碩公主仍乘坐銀頂轎。○五十七年議准。固倫公主和碩公主府門。俱應設立行馬下馬椿。其下馬椿之高下。固倫公主視親王和

碩公主視郡王。至行馬之數目尺寸。固倫公主仍與親王同。和碩公主仍與郡王同。准設行馬下馬格

諭旨已載王公儀衛門內。

福晉夫人儀衛。崇德元年定。親王福晉清道旗二。銷金紅繖一。青扇一。拂子二。金盃一。金盆一。紅仗。吾仗各二。轎車紅蓋紅幃。青緣蓋角。青垂幃。赴朝止用繖扇紅仗。吾仗。郡王福晉減金盃。紅仗。餘視親王福晉。轎車紅蓋紅幃。藍緣蓋角。藍垂幃。赴朝用繖扇。吾仗。貝勒夫人銷金紅繖一。拂子紅仗各二。轎車青蓋青幃。紅緣蓋角。

紅垂幃。赴朝用繖。紅仗。以上執事人。均青衣。紅帶。青帽。銀頂。上插紅翎。貝子夫人車。青蓋。藍幃。紅緣。蓋角。紅垂幃。鎮國公夫人車。藍蓋。藍幃。紅垂幃。輔國公夫人車。藍蓋。藍幃。青緣。紅垂幃。鎮國將軍夫人車。青蓋。藍幃。青垂幃。輔國將軍夫人車。藍蓋。藍幃。藍垂幃。奉國將軍。淑人車。藍蓋。素幃。藍垂幃。親王以下各側室儀衛。均降適一等。○順治四年定。親王福晉。曲柄繖一。紅方繖二。紅繡花繖二。青繡花扇一。紅繡孔雀扇一。轟二。立瓜。臥瓜。骨朵。吾仗各二。郡王福晉。紅繡孔



雀扇二。減曲柄織方織青花扇臥瓜。餘視親王  
福晉。貝勒夫人紅繡花織一。青繡花扇一。立瓜  
吾仗各二。王以下貝勒以上各側室均降適一  
等。親王福晉以下各轎車之制。惟輔國公夫人  
改用藍蓋藍幃。紅緣蓋角。青垂幃。餘均與初定  
例同。○九年題准。親王福晉曲柄織一。紅繡寶  
相花織二。青繡寶相花扇二。紅繡孔雀扇二。轟  
二。立瓜臥瓜骨朵吾仗各二。轎車紅蓋紅幃。青  
緣蓋角。紅垂幃。世子福晉減寶相花扇。轎車青  
垂幃。餘均視親王福晉。郡王福晉減曲柄織臥

瓜。餘視世子福音。轎車紅蓋紅幃。藍緣蓋角。藍垂幃。貝勒夫人紅繡寶相花繖一。青繡寶相花扇二。立瓜吾仗各二。轎車青蓋青幃。紅緣蓋角。紅垂幃。貝子夫人以下。奉國將軍淑人以上。車飾均如舊制。○康熙六年題准。親王福音側福晉郡王福音轎夫執事人。用繡團獅綠緞衣。郡王側福音貝勒夫人轎夫執事人。用素綠緞衣。凡福音夫人赴朝儀衛至。

紫禁城止。親王世子福音許隨入婦女四名。郡王福音三名。貝勒夫人二名。貝子公夫人一名。○

三十年定。親王福晉轎車紅蓋紅幃。青綠蓋角。金黃垂幃。世子福晉紅蓋紅幃。青綠蓋角。紅垂幃。郡王福晉紅蓋紅幃。青綠蓋角。青垂幃。長子福晉紅蓋紅幃。藍綠蓋角。藍垂幃。貝勒夫人紅蓋青幃。青綠蓋角。紅垂幃。貝子夫人紅蓋藍幃。藍綠蓋角。紅垂幃。鎮國公夫人青蓋青幃。紅綠蓋角。紅垂幃。輔國公夫人青蓋青幃。藍綠蓋角。紅垂幃。以上各側室均降適一等。鎮國將軍夫人青蓋藍幃。紅垂幃。輔國將軍夫人藍蓋藍幃。紅垂幃。奉國將軍夫人青蓋青幃。青垂幃。奉恩

將軍恭人同。車。自長子福晉以上朱轅。貝子夫人以下紫轅。奉國將軍淑人以上黑轅。輪均用朱。其幃蓋幃。公夫人以上用雲緞。鎮國將軍夫人以下用素緞。

欽定大清會典事例卷四百八

禮部

儀衛

京官儀衛

外官儀衛

命婦車輿

京官儀衛○崇德元年定。固倫公主額駙。畫雲紅纒一。豹尾槍二。旗六。紅仗二。執事人青衣紅帶。青氈帽。銀頂上插紅翎。城內止用纒仗。超品公。和碩公主額駙。杏黃纒一。豹尾槍二。旗六。城內止用前引二名。從人十名。民公郡主額駙。豹尾槍一。從人八名。餘視超品公。子都統尚書縣主額駙。減豹尾槍。從人六名。餘視公。內大臣大

學士副都統護軍統領前鋒統領侍郎郡君額駙。旗六。城內止用前引二名。從人四名。一等待衛護衛參領前鋒參領縣君額駙學士郎中旗四。城內止用從人四名。二等待衛護衛鄉君額駙佐領員外郎旗二。城內止用從人二名。三等待衛護衛護軍校主事以下官許用從人一名。

○順治三年定。公掌扇貼方金一塊。一品官扇貼圓金四塊。二品官扇貼圓金三塊。三品官扇貼圓金二塊。四品官用灑金扇。五六七品官用黑素扇。八九品官用白素扇。○六年定。公以下

四品官以上。用大小灑金扇各一。文職用甘蔗棍二。武職用梭棍二。○八年題准。民公和碩公主額駙。杏黃緞二。旗十。大小扇二。各貼方金四。侯郡主額駙。杏黃緞一。旗十。扇二。各貼方金三。伯扇二。各貼圓金一。餘視侯。一品官旗八。扇二。各貼圓金四。緞視伯。二品官旗六。扇二。各貼圓金三。緞視一品。三品官扇二。各貼圓金二。餘視二品。四品官旗四。灑金扇二。宗室覺羅之有官者。各從其品。惟扇柄及棍皆棗以朱。以上旗緞。在京城內不得用。進

皇城內止用小扇。不得用大扇及棍。○又定官民等鞞牙縫。不得用黃色。○九年題准。公侯伯都統尚書內大臣大學士及漢文官三品以上。皇城外許乘四人暖轎。願乘馬者聽。漢武官不准乘轎。各官扇上。均書清漢字官銜。○康熙元年題准。滿漢公侯伯都統內大臣鎮國將軍子輔國將軍護軍統領前鋒統領副都統男大學士學士尚書左都御史侍郎左副都御史鑾儀使通政使大理寺卿以上。在

皇城外許乘四人暖轎。願乘馬者聽。○又停止滿



漢學士左副都御史。鑾儀使通政使大理寺卿  
設儀衛乘轎。○又定。公和碩公主額駙。旗十。杏  
黃纒二。金黃棍四。執事人青衣綠帶。紅氈帽。銅  
頂上插綠翎。京城內止用纒一。侯伯郡主額駙。  
減纒一。餘視公。都統鎮國將軍內大臣縣主額  
駙。子滿漢大學士尚書左都御史。旗八。杏黃纒  
一。棍二。執事人青衣綠帶。紅氈帽。銅頂輔國將  
軍郡君額駙。護軍統領前鋒統領副都統男滿  
漢侍郎學士九卿正卿鑾儀使左副都御史步  
軍統領旗六。餘儀衛執事人。均視都統。三品官

儀衛視輔國將軍。四品官旗四。京城內一品官以上用緞一。棍二。二品官用棍二。○三年定。男散秩大臣。在京城內停設儀衛。散秩大臣內有世襲子爵者。得設儀衛如子。○四年題准。四品以上官。乘馬許用繁纓。在京大九卿詹事以上。武官男副都統散秩大臣以上。許用一人引馬前導。餘官不得僭用。○六年定。都統鎮國將軍內大臣。縣主額駙子。滿漢大學士尚書左都御史。執事人帽頂上插綠翎。○七年題准。凡加太師公和碩公主額駙。金黃棍四。改為紅棍四。棍

端用銅鑲。執事人用綠布衣綠帶。紅氈帽。銅頂上插綠翎。繖扇照前定例。○又定。民公及加級侯郡主額駙。金黃棍四。改為紅棍四。棍端用銅鑲。執事人衣帽照前定例。○八年題准。在京官停用杏黃繖。金黃棍。民公以下官員均照順治八年例。○又定。公以下官員出京城許用傘籠。閑馬前導。軍民人等不得用。違者治罪。○三十九年奉

旨。衣服鞞轡原有禁例。今觀鞞轡等飾甚為僭越。下至家奴鞞鞞皆用鍍金。朕御鞞轡未嘗以金飾之。如此

之類。尤當嚴禁。欽此。遵

旨議定。馬鞞惟三品官輕車都尉以上。許用虎皮及狼  
狐皮。有品級無品級筆帖式。及庫使舉人官生  
貢監生員護軍領催。以至兵民等。馬鞞不得用  
繡及倭緞。絹綾鑲緣。鞞韉紅托鞞轡等物。不得  
用鍍金。○雍正元年

諭。大小官定有品級。近有不分官職。馬繫紫纓。使人引  
馬。嗣後著八旗都統步軍統領都察院嚴行稽察。如  
有此等。即行摺奏。如大臣等徇情疏忽。查出將該管  
並大臣等一併議處。又諸王有賞所屬人員鞞轡者。

著行文該旗註冊。歲終彙奏。○七年

諭。聞近來引馬繫纓之屬。有不按定例。任意假借者。嗣後大城內著步軍統領稽查。外城著五城御史稽查。僕有違例僭越之人。步軍統領御史不叅奏。別經發覺者。將稽查之人。一併處分。○乾隆十五年

諭。本朝舊制。文武滿漢大臣。凡遇朝會皆乘馬。並不坐轎。從前滿洲大臣內有坐轎者。是以降旨禁止。武大臣坐轎。未禁止。文大臣。今聞文大臣內。務求安逸。於京師至近之地。亦皆坐轎。若謂在部院行走。應當坐轎。則國初部院大臣未嘗坐轎。此由平時不勤習技

業。惟求安逸之所致也。滿洲大臣當思本朝舊制。遵照奉行。似此並不演習乘馬。儻遇緊急官差。將何如耶。嗣後文大臣內。年及六旬。實不能常乘馬者。著照常坐轎。其餘著禁止。再王公等不分老幼。一概坐轎。亦非古道。嗣後長朕一輩之王等。著照常坐轎。其餘王公內有高年者。亦許坐轎。餘皆乘馬。王等既有儀衛。除年節列儀衛坐轎朝賀外。平時皆著乘馬。將此通行傳知。儻禁止後有坐轎者。著查旗御史。即行查叅。若御史不叅奏。經朕訪聞。一併治罪。斷不寬宥。

又

諭前因諸王及部院滿洲大臣等。皆互尚安逸。行動坐  
轎。並不乘馬。經朕降旨禁止坐轎。是令伊等嫻習武  
藝。毋致廢弛滿洲舊制之意。並非謂大臣等不應坐  
轎也。近聞王大臣內。竟有坐車者。試思坐車與坐轎  
何異。此乃諸王大臣等全未識朕欲挽回滿洲舊制  
之意。仍耽安逸。致朕降旨。亦覺赧顏。誠不知伊等是  
何居心也。朕思王大臣。早起來圓明園。連朝奏事。或  
身有疾病。坐轎亦未為不可。嗣後諸王及滿洲文職  
一品大臣。如早起來圓明園。或身有微疾者。著照常  
坐轎。王大臣等不識朕意。仍總不乘馬。專坐轎者。經

朕查出。必懲數人。以為衆戒。伊等各宜仰體朕體恤之意。毋致廢弛。滿洲武藝。應乘馬之處。照常乘馬。免勉向上。再八旗大臣。以不應坐轎。久經禁止。近聞有坐車者。但伊等有何勞苦。官差亦尚安逸。坐車耶。且伊等既有教訓官兵之責。理宜為衆表率。嗣後八旗大臣及部院二品以下堂官內。僅有坐車之人。著御史等即行指名題參。朕必將違禁之人治罪。斷不寬宥。○二十一年

諭王公大臣等。轎夫多開賭場。不獨引誘旗人。有礙生計。此等惡習。所關甚鉅。前降旨王等及頭品文職大



臣。並年歲已到之文職大臣。准其坐轎。餘均不准乘坐。特令嫻習騎馬。並為旗人生計。禁止轎夫開賭之意。今年少職分未到之人。俱皆乘轎。又不嚴行管束。任聽轎夫開賭。殊屬不成事體。嗣後惟親王郡王大學士尚書。准其坐轎。貝勒貝子公都統及二品文職大臣。俱不准坐轎。仍飭令坐轎之王大臣等。各將轎夫管束。僕仍違例乘轎。及轎夫開場聚賭。著步軍統領衙門該查旗御史叅奏。嚴加議處。如若徇隱。經朕訪聞。定將失察各員。一併治罪。○五十五年

諭。內外文武大臣。特恩賞在紫禁城內騎馬。用資代步。

但年老足疾之人。上馬亦覺艱難。如大學士嵇璜雖經賞馬。仍恐難於乘騎。嗣後已經賞馬之大臣。因有足疾難於步履者。著加恩准令乘坐小椅。旁縛短杆。用兩人舁行入直。以示朕眷念大臣。恩加體恤至意。尚書李世傑患病。兼有足疾。著加恩准照此例。○嘉

慶二十一年

諭。朕風聞鄂勒哲依圖索特納木多布齋二人。近日坐轎。並見鄂勒哲依圖穿用皂鞢。伊等均係蒙古。且現任御前大臣領侍衛內大臣。亦屬武職。並無坐轎之例。從前拉旺多爾濟丹巴多爾濟坐轎。係特恩所賞。

今鄂勒哲依圖索特納木多布齋。未奉諭旨。即私行坐轎。且鄂勒哲依圖又穿皂鞋。貪尚安逸。殊屬不合。著傳旨申飭。仍交理藩院議處。○道光二十五年

諭。文武大臣曾經賞馬者。滿洲人員年至六十五歲。漢員年至六十歲。俱准其乘坐二人椅轎。以示優恤。

外官儀衛。○康熙五年定。各省駐防將軍副都統。視在京都統副都統。○七年題准。文官總督。杏黃纒二。金黃棍二。旗八。扇二。兵拳二。雁翎刀二。飛虎旗二。獸劍二。藤棍二。皮槩二。槍四。迴避牌二。肅靜牌二。巡撫減兵拳雁翎刀飛虎旗及

槍二。餘同。布按兩司。減旗二。及獸劍藤棍槍。餘  
視巡撫。道府杏黃繖一。旗四。扇一。藤棍二。皮槩  
二。迴避牌二。肅靜牌二。同知通判知州知縣藍  
繖一。扇一。藤棍二。皮槩二。迴避牌二。州同州判  
縣丞藍繖一。藤棍二。雜職竹板二。武官提督藤  
棍皮槩改用刑杖二。餘視總督。總兵。大刀一。減  
兵拳雁翎刀刑杖及槍二。餘視提督。副將杏黃  
繖一。金黃棍二。旗六。扇二。迴避牌二。肅靜牌二。  
參將遊擊都司。杏黃繖扇各一。旗四。藤棍二。迴  
避肅靜牌各二。守備減牌。餘視都司。○乾隆二

十二年

論外省駐防將軍。及綠營之提鎮。出行則皆乘輿。夫將軍提鎮。有總統官兵之責。若養尊處優。自圖安逸。亦何以表率營伍。而作其勇敢之氣。况旗人幼習騎射。即綠營中亦必以其弓馬優嫻。始厯加升用。乃一至大僚。轉致狃於便安。忘其故步。此豈國家簡擢之意耶。京師都統副都統。既皆乘馬。而滿洲侍郎。則無論年逾六旬。亦皆不得乘輿。即朕巡省所至。尚每日乘馬而行。乃外省武職。獨相沿陋習。此甚非宜。嗣後將軍提鎮。概不許乘輿。其編設轎夫。並著裁革。如有仍

行乘坐者。照違例治罪。○又

論前因外省將軍提鎮有表率營伍之責。出皆乘輿。恐致狃於便安。是以特行禁止。但此內宣力已久之年。老大員。又未可一概而論。嗣後如年逾七十。不能常行乘馬者。令該員自行酌量。奏聞請旨。餘不得假借。○二十九年議准。佐雜微員。例給馬夫一名。是乘馬乃其本分。但外省土風不一。或有艱於畜馬之處。偶用二人肩輿。相習成風。遂至乘坐大轎。嗣後應嚴禁奢僭。以砥廉隅。飭令各省佐雜等員。概行乘馬。其有不能畜馬地方。許用二人

肩輿。不得乘坐大轎。違者叅處。○四十九年

諭據孫士毅奏。審明龍門協副將承祿治罪一摺。已批該部議奏矣。閱其摺內。據承祿供前在江南遊擊任內。墜馬傷股。值患處作痛。曾坐轎數次等語。武職人員。違例坐轎。不特滿員禁止。即漢員亦向來不准。屢經申明降旨。昨因副都統果星阿在山海關私自坐轎。復降旨通行飭諭。承祿身為滿洲。由佐領補放遊擊。洵擢副將。自當加倍奮勉。以訓練兵丁弓馬為事。乃該員先自偷安坐轎。又安望其整頓戎行耶。今承祿業經治罪。但該上司等何以漫無約束。任聽其公

然坐轎。所有失察之總督提鎮等。著查明交部議處。經此次重行申禁之後。如武職人員。仍敢違例乘轎者。一經叅奏。朕必將該員加倍治罪。若督撫提鎮等不行查叅。別經發覺。並將該督提等一併從重議處。將此通諭知之。

命婦車輿。崇德年間定。超品公命婦車。青蓋青幃。青垂幃。公命婦藍垂幃。餘同。都統尚書子等官命婦車。青蓋藍幃。藍垂幃。內大臣大學士副都統護軍統領前鋒統領侍郎等官命婦車。藍蓋藍幃。藍垂幃。一等侍衛護衛叅領前鋒叅



領。學士。郎中等官命婦車。藍蓋素幃。藍垂幃。二等侍衛護衛佐領等官命婦車。素蓋素幃。藍垂幃。○順治九年題准。公命婦車。青蓋青幃。綠綠蓋角。綠垂幃。侯伯命婦車。青蓋青幃。綠垂幃。一品官命婦車。青蓋青幃。青垂幃。以上均用銀頂。二品官命婦車。青蓋藍幃。青垂幃。三品官命婦車。藍蓋藍幃。青垂幃。四品官命婦車。藍蓋藍幃。藍垂幃。五品以下官命婦車。藍蓋藍幃。無垂幃。以上均用錫頂。庶民妻車。藍蓋藍幃。無垂幃。黑油木頂。○康熙元年題准。三品以上官命婦車。

用銀頂。四品以下官命婦用錫頂。庶民妻同。違者治罪。三十年定。三等公夫人車。綠蓋青幃。藍緣蓋角。綠垂幃。侯伯夫人車。綠蓋青幃。藍緣蓋角。綠垂幃。內大臣都統。大學士。尚書。左都御史。子。一品夫人車。青蓋青幃。綠緣蓋角。綠垂幃。散秩大臣。前鋒統領。護軍統領。步軍統領。副都統。侍郎。學士。左副都御史。通政使。大理寺卿。詹事府。詹事。男。夫人車。青蓋青幃。綠垂幃。以上各幃。蓋。幃。均用素緞。一等待衛。參領。步軍翼尉。王府長史。太常。太僕。光祿寺卿。國子監祭酒。大理

寺少卿內閣侍讀學士翰林院侍讀侍講學士  
侍讀侍講少詹庶子洗馬鴻臚寺卿郎中給事  
中御史太常太僕光祿寺少卿輕車都尉淑人  
車青蓋青幃青垂幃以上車均用銀頂閒散宗  
室二等侍衛佐領員勒司儀長欽天監監正內  
閣侍讀園子監司業鴻臚寺少卿通政司參議  
中允員外郎步軍協尉騎都尉恭人車青蓋藍  
幃青垂幃三等侍衛雲騎尉宜人以下車藍蓋  
藍幃青垂幃以上均用錫頂幃蓋幃用布轅輪  
均用黑自公以下有頂戴官員以上各命婦均

從夫現在品級。不准以加級用。